

84 коми
0-24

НИНА
ОБРЕЗКОВА

ДИВЬ- КОЗИН



КОНТРОЛЬНЫЙ ЛИСТОК
сроков возврата




Книга должна быть возвращена
не позже указанного срока

25/XI-16

0-24

НИНА ОБРЕЗКОВА

Дивö-козин



420833

ГБУ РК «Национальная детская
библиотека Республики Коми
и.и. С.Я. Маршака»
167981, г. Сыктывкар, ГСП-1, ул. Советская, 20



Сыктывкар
2015

ББК 84(2Рос.Ком)

024

*Издано при финансовой поддержке
Агентства Республики Коми
по печати и массовым коммуникациям*

Небӧгсӧ серпасаліс
Мария Шишкина

Обрезкова Н. А.

024 Дивӧ-козин. – Сыктывкар: ООО «Анбур», 2015. – 32 л.б.

ISBN 978-5-91669-145-0

ББК 84(2Рос.Ком)

Нина Обрезковалӧн «Дивӧ козин» небӧгын Вера нима
нывка веськалӧ мойдӧ, кӧні олӧны Ёма, Вӧрса да Васа. Ёма
сорасьӧ Вералы отсавны пикӧ воӧм Кӧрлы. Но нывкалӧн
эм бабуш да выль ёрт – Сонюк нима фотоаппарат. Вермас-ӧ
Вера Ёмаӧс? Лыддьӧй да тӧдмаланнӧд...

ISBN 978-5-91669-145-0

© Обрезкова Н. А., 2015

© Шишкина М. А., иллюстрации, 2015

© Оформление. ООО «Анбур», 2015

Дивӧ-козин

Чужан лун кежлас бать-мамыс козьналісны Вералы фотоаппарат. Вера кватитіс еджыда-сьода кудсӧ да уськӧдчис аслас жырйӧ. Сэс-ся здук кежлӧ восьтыліс ӧдзӧссӧ да горӧдіс:

– Аттьӧ!!!

Вера дыр нин виччысис татшӧм козинсӧ. И со, бать-мамыс быттӧ кылӧмаӧсь сылысь гуся мӧвпъяссӧ. Ӧні сэсся Света Балабанова оз нин кут нырсӧ лэптавны. А то петас ывлаӧ да



сöмын и тшолкайтö. То понъясöс, то гаражъ-
яс вылысь серпасъяс, то паркöдз лэччылас да
сэтысь пуяссö да кöляскаа мамъясöс «лöдö»
фотоаппаратас. Сэсся «В Контакте»-ö пуктö
да виччысьö, кодi ошкас сылысь фотояссö да
гижыштас мыйкö. А мый ошкынысьö? Татшöм
фотоясыд быдöнлөн эм.

«Ме кута снимайтны сöмын сэтшöмтор,
мый дзебöма йöз синмысь... Гусятор, кодöс оз
быдөн аддзы», – мöвпаліс Вера да став сьölöм-
сяньыс эскис, мый сылы тайö гусяторйыс быть
восяяс.

Войнас Вера дыр эз вермы унмовсьны. Сійö
видлаліс Sony нима фотиксö, личкаліс кнопка-
яс да пыр мöвпаліс, кызди сійö снимайтас сэт-
шöмтор... сэтшöмтор..., мый ставөн чуймасны
да «В Контакте»-ын кутасны ошкыны сöмын
сылысь фотояссö. Сонюкөн и нимтіс Вера выль
ёртсö.

Но нывка некыз эз вермы думыштны,
мый сійöс виччысьö регызъя кадö.

Вера помаліс коймöд класс. И гожöм кеж-
лас батыс нуöдіс нывкаöс сиктö бабуш дорас.
Вера овліс нин тані кымынкö гожöм, купайт-
чис, вотчис бабушыскöд, отсаліс градъяс весав-
ны. А рытъяснас кывзіс бабушыслысь висъта-
сьöмсö. Бабушыс висътавліс Вералы, мый тані
сійö вермас шöпкöдчыны тöвкöд, корны кы-

мөръяслысь зэр либө шонді, аддзыны висьом бурдодан быдсяма турун-вуж, ёртасьны Олысякөд да Пывсян Айкакөд. Вера кывзис бабушсө да став сьолөмсянныс эскис сылы, көть эськө Олысяыс ньотчыл на эз петкөдчыв Вералы, весиг эз матыстчыв сёяна неыджыд тасьті дорө... Да и кымөръясыд эз кывны сылысь шонді кевмөмсө, кор көсийсны, сэки и зэрисны.

Но Вера төдіс нин, мый васө тані позьö юны веськыда юсьыс, тшак-вотөсыс, кодөс найö бабушыскөд вотлісны гожөм помланьыс, ёна чөскыдджык карын ньөбөм дорысь... А өмидзсө кутшөм кокни вотны: торъя копрасьны оз ков – вотөсыс сяркмунөма дзик син водзад, өти тусь бидонас, кыкөс вомас, өтикөс бидонас, кыкөс вомас...

Сөмын восьтіс Вера дзиръясө, сы дорө пырысьтөм-пыр уськөдчис Найда, бабушыслөн пашкыр гөна понйыс.

– Найда, Найда, муса тэ менам... Чолөм, чолөм, Найдук...

Найда вөлі зэв төлка пон: ассьыс уджсө – керка да керка гөгөр видзөм – төдіс бура. Но Веракөд ёна радейтіс ворсны да меліасьны. Со и өні, чеччаліс нывка гөгөр, нюліс сылысь чужөмсө, кисө...

Вера перйис зепсьыс кампет, разис кышсө да мыччис Найдалы. Пон ньөжйөник бось-

тіс вомас Вера кийсь кампетсö, ньылыштіс да нöшта на ёна кутіс радлыны-дурны.

– Гажтöмтчöма Найда, гажтöмтчöма Вераысь, – шыасис бабушыс, керка сайысь петіг-моз.

– Бабуш! Бабуш! А кызди ме тэысь гажтöмтчи, тэ весиг он тöд.

– Ог, дерт, – нюммуніс бабушыс да содтіс: – А быдмöмыд тай, кага, пöрнöй невеста лоöмыд. Жöникыд эм жö?

– Но, бабуш, – дузмуныштіскодь Вера, но здук мысти нин уськөдчис бабушыс дорö, сывъяліс топыдасьыс-топыда да бара на шуис. – Бабуш тэ менам, бабуш!

– Мам, ме кутшöмсюрö вöлöга вайи, – шуис батыс, машинасьыс ыджыдкодь ноп перйиг-моз. – А тані Веруклөн кунды-мундыыс.

– Ог эськө тшыгъялöй Веракөд да, но вайöмыд да, бөр öд он ну. Энлы, – бабуш котөрөн-моз пыраліс керкаас да петкөдіс пакет тыр көлөб да картупеля шаньга. – Ну гортад, Мари-натö гөститөдан. Но. Бура мун, видзчысьöмөн.

Батыс воськовтіс машиналань, сәсся друг бергөдчис да шуис:

– Мам, тэ кагасö Вöрсанад да Васанад ёна эн повзьöдлы.

– А ме ог пов! – суйсис сёрниö Вера. – Көть öні жö муна Вöрсакөд киясьны. Сылы öд, көнкö, гажтöм жö-а.



– Кылан, Мишö, кутшöм збой тэнад нылыд?

– Сэтшöм тай. Кага, бабушыдлысь кывзысь, – шуис батыс да муніс.

– Ой, бабуш, видзöдлы, мый меным козьналісны. – Вера перйис мышнопсыс фотоаппаратсö да мыччис бабушыслы. – Фотоаппарат. Эн бара-й уськöд!

– Ог и босьт киö. Зэв тай мича. А мый нö эськö татысь тэ көсьян снимайтны?

– Тэнö, Найдаös, керкатö, эсійö пусö... Ставсö! – кыпыда шуис Вера да сэсся гусьöнмоз содтіс. – А нöшта ме эськö көсья снимайтны Вöрсасö да Васасö...

– Но-о! – чуймис бабушыс. – Найö öд йöзыдлы некор оз петкöдчывны. Кыдзи нö тэ найös снимайтан?

– Ог тöд, – ышловзис Вера да дзумгис фотиксö рюкзакас.

Бабушыс сюся видзöдліс Вера вылö, сэсся мудера нюммуніс да шуис:

– Ставыс овлö ас кадö, – сэсся содтіс: – Лок, пырам керкаас...

Баба-ныла пырисны керкаö. Вера видзöдаліс керка пытшкөссö, дзоръяліс, и ставсö быттö первойысь аддзис – и ыджыд пачсö, көні бабушыс пöжаліс чöскыд нянь, и ен ув пельöссö, кысянь видзöдіс шань синма енмыс, и батыслысь фотояссö стен вывсьыс, көні сійö вöлі сы арлыда, сэсся школа помалöм

бöрын, армияс, а со, и мамукыскöд кöлысь дырйи фотоыс...

Вера дзоръялігкості бабушыс пыралöма пытшкöс жыръяс да петігмозыс и шуис:

— Верук, ме öд тэныд дасьті жö козин-тö. — И бабыслөн чукурöсь киас дзирдыштіс зарни чусі. — Новлы, кагук, чусісö да бабушсö некор эн вунöд, а ленточкаыс мед видзас тэнö став лёксыйс, — содтіс бабыс да мыччис кык гöрд ленточка.

Вера кыскис пельсыйс «гвоздикъяссö», пелька пысаліс бабушыслысь козинсö, котöртіс рöмпöштан дорö.

— Бабуш, кутшöм мича чусіыс, да сэтшöм кокни, быттö пелям нинöм абу.

— Новлы, Верук, новлы. А öні вай ужнай-там нин, регыд водан кад, а тшыг кынöм-над кутшöм узьöм...

...Аскинас Вера Найдакöд мöдöдчисны матысса вөрö. И, дерт, Вера босьтіс сьöрсыйс фотиксö. Мунöны вöляникысь, Вера гербарий вылö турун-дзоридз öктö, нимсö эськö оз ставлысь тöд, да öд бабушыс отсалас. Найда то орччөн мунö, то Вера гөгөр гартчö. Друг вөр пасьталаыс кыліс:

— Трак, так-так!!! Трак-так-так!!!

Вера виччысьтöмысла шай-паймуніс, а сяс-ся видзöдліс вывлань: пу вылын пукаліс катша да третшкис:

– Трак-так-так!!! Трак-так-так!!!

А катшаыс кутшөмкө тешкодь – эзысьөн лөсталө. Вера өдийө перйис фотоаппаратсө, аддзис сы пыр катшаос да көсийис личкыны кнопкаас, но фотикыс ачыс тшолкнитис, и Вера кылис, мый фотоаппаратыс... сёрнитө. Быттьө вуджөдө катшалалыс третшкөмсө морт кыв вылө. Чуймөмысла Вера первойсө весиг эз гөгөрво, мый висьталө сылөн Сонюкыс:

– ...Ёма. Көр-р-р лоома кос пуөн... Ёма пөр-р-ртөма Көр-р-рөс кос пуө. Отсалөй, бур-р-р йөз!!! Мездөй Көр-р-рсө!!! Бур-р-р йөз!

Катша лэбзис пу вывсьыс, и фотоаппаратыс лөнис. Вера гөгөрбок видлалис фотиксө. Быт-



тѳѳ нинѳѳн оз торъяв мукѳѳд фотикысь. Мый эськѳѳ тайѳѳ вѳѳлі? Но кадыс дырсѳѳ мѳѳвпавны эз вѳѳв – колѳѳ котѳѳртны отсавны неминучаѳѳ весь-калѳѳм Кѳѳрлы.

– Найда, корсь пусѳѳ! – горѳѳдіс Вера да усь-кѳѳдчис Найда бѳѳрся. Сѳѳмын и удитіс дзумгыны Сонюксѳѳ рюкзакас.

Котѳѳртісны, котѳѳртісны, и друг петісны восьса эрд вылѳѳ. Паськыдкодъ эрд, а эрд шѳѳрас косъмѳѳм пу сулалѳѳ. Гѳѳгѳр лѳѳнь, весиг лѳѳбачьяс оз дзользыны, тѳѳвру оз пѳѳльышт.

– Найда, Найда, видзѳѳд – со, пуыс! Коньѳѳрѳѳй... – Вералѳѳн синваыс чепѳѳсйис. – Час, час. ТерпITYшт, ме тѳѳныд отсала...

Найда чепѳѳсйис пу дорас, увтны босьтчис. Дрѳѳгмунісны пулѳѳн кос чальясыс. Вера лѳѳньѳдіс понсѳѳ, сѳѳсся ачыс пу гѳѳгѳрыс кытшовтіс. Вешйыштіс, ылісяньджык видзѳѳдліс.

– Найда, видзѳѳд, и збыль, чальясыс кѳѳр сюръяс кодъѳѳсь, а пучерыс кѳѳр мыгѳѳрланъ жѳѳмунѳѳ.

Бара матыстчис нывка пу дорѳѳ и кыліс, мый пуыс ловъя, быттьѳѳ пыдісянь ышлолалѳѳ да кевмысьѳѳ. Но Вера эз гѳѳгѳрво пулысь кев-мѳѳмсѳѳ. Сѳѳсся дум вылас уси фотикыслѳѳн ѳн-тая ловзылѳѳмыс, перйис фотиксѳѳ да сы пыр видзѳѳдліс пу вылас. Но ѳні фотоаппаратыс чѳѳв оліс.

– Сонюк! Сонюк! Но мый нѳѳ тѳѳ? Садьмы!!!

Но фотикыс нинӧм эз вочавидз. Ышловзис Вера, нӧшта гӧгӧртис пусӧ, тшолкнитис фотик-нас да и мӧдӧдчисны Найдакӧд гортланьыс.

Рытивбыд Вера мӧвпаліс, кыдзи отсавны Кӧрлы, весиг бабушыслысь нин кӧсйис юавны. Сэсся шуис аслыс: «Ог юав, сэсся бабуш оз лэдз вӧрас». Бара гӧгӧрбок видлаліс фотоаппаратсӧ, видзӧдіс пулысь фотосӧ, но нинӧм сэтшӧмсӧ эз казав.

Регыдӧн нывка унмовсис. И аддзис вӧтнас, быттьӧ мунӧ сійӧ томиник пожӧмъяса вӧрті, а сэсся петіс ю дорӧ. А ваыс юас сӧстӧмсьыс-сӧстӧм, пыдӧсыс тыдалӧ. Гумовтіс сійӧ васӧ и друг аддзис, мый ваысь сы вылӧ Кӧр видзӧдӧ да висьталӧ мыйкӧ. Копыртчис Вера валаньыс да кыліс:


– О-о-о-тсав ме-е-е-ным, Вера-а-а, юктӧ-ӧ-ӧд мен-ӧ-ӧ ло-о-о-въя ва-ӧ-ӧ-н. – Шуис тадзи Кӧр да вошис.

Садьмис Вера, а орччӧн куйлысь фотикас «видео» уджалӧ. А сәні тшук сійӧ, мый вӧтнас аддзыліс: ва пытшкын Кӧр да корӧ Вераӧс отсавны:

– О-о-о-тсав ме-е-е-ным, Вера-а-а, юктӧ-ӧ-ӧд мен-ӧ-ӧ ло-о-о-въя ва-ӧ-ӧ-н.

– Верук, дона ныв, чеччы, мыссьы да лок асья чай юам. Небыд картупеля шаньгаӧн, – кыліс инпӧвсьыс* бабушыслӧн гӧлӧс.

* Инпӧв – кухня (удор.)



– Час, час, бабуш, – Вера чеччис, пуктіс лөн-
ньом нин фотиксё пызан вылас, өдйё пасьтасис
да петіс инпөлө. Төдіс сійө, мый бабушыслөн
небыд картофеля шаньгаысь чөскыдыс став
вөльнөй светас нинөм сэсся абу. Сёлькнитіс
васё унзіль на синмас, чышкысис бабушыслөн
вышивайтөм ки чышкөднас да пуксис пызан
сайө.

– Бабуш, ме дасы!

– Сюмалө жө тай кынөмыд, – нюммуніс
бабушыс. – Нөкъя рысьсё первой паняв.
А сэсся и картофеля шаньгаён йөв юан.

Вера довкнитіс юрнас, но первой кватитіс
шаньгасё. Вайөдіс нин вом дорас да друг
быттё джөмдіс. Төд вылас уси войся вөтыс.
Пуктіс бөр шаньгасё...

– Мый нө, Верук, эз кажитчы?

– Чөскыд, бабуш, зэв чөскыд! – Сэсся гу-
сьөнмоз шуис: – Бабуш, меным ловъя ва колө.

– Мый нө, картофеля шаньгаыд ловъя
ватөг оз пыр? – серөктіс бабушыс.

Вера быттё эз кыв бабушыслысь серамсо-
ра шуөмсё да бара на юаліс:

– А ловъя ваыс збыльвылас эм?

– Эм, зөлөта, эм. Став ваыс ловъя, бура кө
сійөс видзан. – Бабушыс мыйкө көсйис на юав-
ны, но Вера бара на ассыйс:

– А көні, көні сійө эм?

– Да көть гортдорса юкмөсаным.

— Миян юкмөсын??? — Вералөн шензё-мысла синмыс лоис тасьті кодь. — Миян юкмөсын?

— Да тэ ачыд видзөдлы. Копыртчы юкмөсас, да эн усь сөмын. Шуав юкмөс пытшкас бур кывъяс, со, тэныд и ловъя ва. Гумлав сөмын.

Вера звирк чеччис пызан сайсьыс, дась котөртны юкмөс дорө.

— Да тэ сёйышт, сёйышт, ловъя ваыд оз вош. А мыйла тэныд сійө колө?

— Колө, бабуш, зэв ёна колө! — Вера сувтсөн азыма курччис шаньга, гулькнитіс чай да лэбыштіс ывлаө.

Матыстчис юкмөс дорө, видзөдліс пытшкөсас, а ваыс сэтшөм матын, көть кинад гумлав. Став бур кывсө, кодөс төдіс Вера, шуаліс юкмөс пытшкас. Неуна виччысьыштіс, сэсся лэбовтліс керкалань, босьтіс туис да бөр котөртіс юкмөс дорас.

— Дерт, өні, көнкө, ваыс ловъя нин лои, — аслысмоз шуис Вера да лэдзис ведрасө юкмөсас, гумовтіс васө да бөр лэптіс ведрасө, сэсся кисьтіс васө туисас, шуис нөшта кымынкө бур кыв. Мед нин пө быть ваыс ловъя лоас. Ачыс видліс васө. Нинөм сэтшөмсө эз казав. Сэсся пуктіс фотоаппаратсө рюкзакас, чукөстіс Найдаөс, да мөдөдчисны найө төдса нин туйөд косьмөм пу дорө.





Но эз пырысьтём-пыр во Вера пу дорад...
Туйыд эськө тődса, но ковмис дырсьыс-дыр
мунны... Туйыс тшөкыда вожаліс, чукльөдліс
вөртиыс...

– Мый нө тайө, Найда? – Вера дзикөдз
шөйөвоши... – Вошам кө?! Бабуш весиг оз тőd,
кытчө мунім... И корсьнытө оз төдны кытысь. –
Вералөн синваыс доршасис. – Найда, тэ вылө
став надеяыс. Öдйөджык колө мунны, косьмас
дзикөдз пуыс.

Коркө воисны жө тődса эрд вылө... Кись-
каліс Вера пусө ловъя ванаc. Эз эськө быдлаө
веськав этшаник ванад, но, колөкө, и збыль от-
салас... Сулалө Вера, виччысьө. И со, мыччы-
сис кос пу вылын нэриник веж кор. Радысла
Вера весиг чеччавны кутіс. Найдаөс окалө.
Сэсся котөртис пу дорас, сывъяліс сійөс...
И кылө Вера, быттө пуыслөн сьөлөмыс тіп-
кыны заводитіс... А, колөкө, и Көрлөн сьөлө-
мыс... Снимайтіс нывка веж корсө. А мый сэс-
ся вөчны, оз тőd. И бара на ковмис мунны гор-
тас, бара на кольны кос пусө.

Лунтыр Вера жугліс юрсө, кыз эськө от-
савны Көрлы. Думыштліс весиг «Google»-ысь
юавны, но өтуввезыд ылі грездъясад эз на ов-
мөдчы. Да и өдвакө сійө төдө, кыз мездыны
Көрөс. Видзөдаліс фотоаппаратсьыс снимокъ-
яссө... Но сідзи эз и вермы нинөм думыштны.
Бабушыслысь эз жө лысьт юавны, көть эськө

бабушыс и юасис, шогмис-ö пö ловъя ваыд? Вера мыйкö шуыштіс, збыльсö эз висьтав. Вєськыда кö шуны, пылыштіс, мый бабушыс, ставсö кö тöдмалас, оз кут лэдзны вöрад... А сылы быть на колö ветлыны сійö эрд вылас.

Сэтшöма Вера мудзис лунтыръя думъяс-сьыс, мый рытнас öдйö и унмовсис. И бара ад-дзис вöтнас Көрөс. Быттö мунö нывка пемыд войын ыбъяс вывтi, и друг вöрысь петö Көр.

– Аттьö, Вера, ловъя ванад юктöдöмысь. Но Ёмаыд вына, зэв вына. Гөрддзав, Вера, менам сюрö гөрд ленточка, да сідзи, медым Ёмаыд эз вермы гөрөдсö разьны. Сэки сылөн ыджыдалöмыс ме вылын помасяс.

Аскинас Вера садьмис водзсьыс-водз. Сьö-лöмыс дась морөссьыс чеччыштны, сэтшöма тіпкö. И друг нывкалы син улас уси фотикыс, а фотик вылас – гөрд ленточка... Но Вера эз нин чуймы, гөгөрвоис, мый Сонюкыс сылөн абу прөстöй. Нывка öдйö пасьтасис, виччы-сьыштіс, кор бабушыс петас Сюраһныс дорö, кватитіс фотиксö, ленточкасö да уйкнитіс гортсьыс. Найда сійöс вөр дорас нин суөдіс.

Пырисны вöрас. Вера тэрыба восьлаліс. И друг... кокыс вöйис гуö... Көсйис мездысьны, но регыд и мөд кокыс лои гуын... Повзис Вера, нетшкысьö, а гуыд оз лэдз. Повзьöмысла Вера бөрддзис:

– Найда, Найда, мый нө вөчны? Тайё нюр, Найда, нюр!!!

Эз прөстө Найдаёс шуны төлка понйөн. Сійё водіс му вылө, нюжөдчис, мый вермис, да водз лапаяссө мыччис Вералы. Вера бергөдчыштіс, нюжөдчис кинас... и эз судз! Найда кыссыштіс нюрлань, бара на нюжөдіс Вера-лань лапаяссө, да мый вынсьыс нин нюжөдіс. Вера выныштчис жө да... судзис Найдаөдз. Төлка пон заводитіс кыссыны бөрвыв, ньөж-йөникөн кыскис ас бөрсяыс Вераёс да... нетшыштіс нюрсьыс.

Нывка уси нюрдорса турун вылө, Найда, сьёкыда кашкөмөн, тшөтш упкысис Веракөд орччөн. Мыйтакө кад кыкнанныс чөв олісны. Сэсса Вера шыасис:

– Төдөмысь, Ёма кимөститчө... Кыдзи нө эськө вуджам нюрсө? А, Найда?

– Ув-ув! Ув-ув-ув! Ув-ув-ув! – вочавидзис Найда.

– Мый, Найда? Мый тэ көсьян висьтавыны? – бөрдөмсорөн юаліс Вера понйыслысь. – Ог гөгөрво ме тэнө.

А Найда увтө, пиньяснас нетшкө Вералысь мышнопсө.

– Фотик! – вирдыштіс юрас Вералөн. – Сонюк, Сонюк миянлы отсалас!

Вера пөрччис мышнопсө, перйис фотиксө да веськөдіс сійёс Найдалань.



– Ув-ув! Колö чегны кыдз пу вож! Сідзи тай миян вуджлöны нюръяссö. Ув-ув!

Гөгөрвоис Вера Найдалысь сёрнисö да нöшта на жугыльмис:

– Кыдзи нö ме вожсö чега? А, Найда?

Найда сюся видзöдліс кыдз пу вылö, сэсся уськөдчис нюр пöлөн. Вера весиг нинöм шуны эз удит. Видзөдö, а Найда кыскö ыджыд кыдз пу вож, косьмыштöма нин эськö пусьыс торъялöм бöрас, но, Найдалөн чайтöм серти, шогмас неыджыд нюртö вуджны:

– Ув, ув!!! – пуктіс Найда вожсö нывка дорö.

– Найда, зөлöта!!! – Вера чеччис, босьтіс косьмыштöм вожсö да воськовтіс нюрлань. Медводз вожнас корсьö косджык вутш, сэтчö воськовтас, да бара корсьö вутш... Тадзи, вутш бöрся вутш, и вуджисны Найдакөд.

А эрдыс матын нин и вөлöма. Гөррдзалис Вера пу вылö ленточкасö. Да сэтшöм гөрөдөн, кутшöмөс велөдліс вöчны батыс – морскöй узел шусьö. Öдвакö Ёмайд татшöм гөрөдтö вермас разьны.

Дрөгнитіс пуыс, кутіс кос чальяснас öвтыны, вужъяссö мусьыс нетшкыны, быттö здук – и мынас Кöрыс Ёма кабырысь...

– Артмис! Артмис, Найда! – Вера радысла оз тöд, мый и вöчны. Найдаöс сывъялö. Пусö снимайтö видео вылö...

Но другысь кыптіс ыджыд төв ныр. Пу
вылас лолыштіс кӧдзыд руӧн, и пуыс лӧнис.
Кос чальясыс лётмунісны. Коркӧя петлӧм веж
корйыс нярмис.

А Вералы забеднӧыс! Но фотикыс друг
бара кывлысис, да сэтшӧм мисьтӧм гӧлӧсӧн,
мый Вера весиг шай-паймунліс.

— Оз артмы тэнад нинӧм! Оз артмы!

— Тэ коді?

— Ме? Ме Ёма.

— Ёма? А тэ кӧні? — Дзоръявны кутіс Вера.

— Ме? Ме быдлаын!!! Мун гортад, эн скӧр-
мӧд менӧ!

— Тэ мыйла Кӧрсӧ пуӧ пӧртін? — збоймис
Вера. — Ӧні жӧ лэдз сійӧс!

— Ах-ха-ха! Ах-ха-ха!!! Кӧр ковмӧма! Ме и
тэӧ верма пӧртны кодӧкӧ! Кодӧн тэ кӧсьян
лоны? Шырӧн? Али зьмейӧн? Али ракаӧн?

Найда кутіс гора увтны фотик вылӧ, мурт-
са оз нетшышт сійӧс Вера киысь. Но Вера эз
сет сійӧс Найдалы, сылы лои окота видзӧдлы-
ны ловъя Ёма вылӧ. Но Ёма эз петкӧдчы, сӧ-
мын гӧлӧсыс кыліс.

— Ме и понтӧ верма пӧртны кӧинӧ, оз кӧ
ланьт! Меным кутас служитны!

А Найда нӧшта на гораджык увтӧ.

— Мед лоас понйыд...

— Эн! — горӧдіс Вера. — Эн лысьт! Эн лысьт,
Ёма! Найда, фу!

– А-а-а-а! Полан жö меысь!? – дзуртыштіс Ёма. – Полан? Мунöй гортаныд!!! Да туйсö татчö вунöдöй!

– Ми мунам, мунам, но тэ, Ёма, тöд, мый ме ньöти тэысь ог пов. И ме отсала Кöрлы мын-тöдчыны тэнад везйысь.

– Ах-ха-ха! – серöктіс Ёма гөлöсөн фотик. – Видлы! Видлы! Этша на роктö сёйин, мед вермасьны мекöд! Мун да бабыдлы висьтав, мед сэсся некор тэнö вöрас оз лэдз... А то, скöрма кö...

– Скöрав кöть поттöдзыд, но ме бöр на вола, – шуис Вера да мыйкö кöсйис на содтыны, но другысь фотикыс сэтшöма пöльыштіс Вера вылö, да Вераöс öдйö и нöбöдіс гортланьыс...

Гортас бабушыс эз вöv. Вера лэбыштіс аслас жырйö, пуксис вольпась вылас да... бöрд-дзис гырысь синваön. Гөгöрвоис, мый и збыльсылөн выныс оз судзсы Ёмакöд вермасьны. Кыліс öдзöс воссян шы – бабушыс. Вера мый вынсьыс эськö кутіс синвасö да шлюпкөмсö, но бабушыс кылöма.

– Мый нö менам зөлöтаыс бöрдö? Кодкö öбöдитіс али мый? – Вералөн жырйö пыригмозыс и шыасис бабушыс. – Али фотоаппараттö воштін?

– Эг, – шлюпкыштіс нырнас Вера, ляскысис бабушыслөн морöсö да сыркъялөмөн бöрд-дзис. Сэсся синвасорөн висьталіс бабушыслы

ставсö: и кос пу йылысь, и сёрнитысь фото-аппарат йылысь, и ловъя ва йылысь, и Ёма йылысь... – Мый нö, бабуш, меным вöчны?

– Сьöкыд, кага, Ёмаыдкöд вермасьны, – такöдiс Вераöс бабушыс. – Но тэ татшöма эн вийсы. Видла ме тэныд отсавны.

– Кыдзи? – бöрдöмсорөн юалис Вера.

– А вот та йылысь эн юась, – нюммунис бабыс.

– Бабуш, тэ мый, кöлдуння? – паськöдiс синсö Вера.

– Кöлдуння не кöлдуння, а мыйсюрö кужышта.

Аскинас бабушыс водза-водз чеччис, нучкасö узьöмөн на чайтiг, шытöг петiс гортсьыс да шлапиктiс вöрлань. А Вералөн кутшöм нин узьöм. Котöрөн чеччис-пасьтасис. Да лэбовтiс бабушыс бöрся. Но бабушыс казялис Вераöс. Виччысьыштiс да дöзмöмөн шуис:

– Шуи öд, отсала, сöмын эн юась, а тэ, со, кыйöдчыны петöмыд. Эн лысьт ме бöрся вöтчыны. Пукав гортын. Локта и ставсö висьтала. – И бабыс быттö сылi вöрас.

Вера эз нин сэсся лысьт мунны бабуш бöрсяыс, бергöдчис да мунис гортас.

Пырис керкаас, пуксис пызан сайö. Пыкис тшöка лысö кулакъяснас да кутiс виччысьны бабушсö...

– Ёма чой, Ёма-а-а!

– Мый нин тэныд колө?

– Петав, мися.

Вера первой бара на шөйөвошліс, сэсся гө-
гөрвоис, мый фотиксьыс кылө сёрниыс. Ква-
титіс фотиксө да аддзө: вөр шөрын сулалө ба-
бушыс.

– Мый нин лои бара? – ружөктіс Ёма да
петіс вөрысь. Вера өдйө-өдйө кутіс личкавны
фотик кнопкаас – мед нин Ёмаыс бура петас
снимок вылас да ставөн эскасны, мый сійө
збыль аддзыліс Ёмаөс.

А бабушыс да Ёма сёрнитісны водзө.

– Тэ, Ёма чой, мыйла менсьым нучкасө
повзьөдлан?

– А мед оз сую нырсө, кытчө оз ков!

– Пессьы ас лёк пиад, а нывкасө эн вөрөд.
Гөгөрвоин?

– Гөгөрвои, – нурбыльтіс Ёма.

– Вот и бур. Тэ меным со мый висьтав.
Мыйла Көрсө миянлысь кос пуө пөртін?

– Мыйла, мыйла... – дзуртыштіс Ёма. –
Мед оз ыръянит дай.

– Мый нин Көрыс тэныд вөчис?

– Дышөдіс меным рос вылын лэбавны. Пө-
рысьми. Мудзи. И тшөкті ме Көрлы новлөдлы-
ны менө көра доддын.

Вера тайөс кылөм бөрын муртса эз чепөс-
йы вөрө Ёмакөд косясьны. Но лөньөдіс асьсө



да шуис: – Электровеник аслыд ньоб, Көр сылы ковмөма...

– Кутшөм электровеник?

– А! – повзис Вера. – Кылө Ёмаыд менө. – Сэссия эз нин шыасылы.

А бабушыс быттьө эз и кыв Ёмалысь юалөмсө. Гөгөрвоис, мый Вера фотикнас видзөдө на вылө.

– Зэв тай ыджыдө пуксян, Ёма. Көр тэныд ковмөма.

– Ме и эм медся ыджыдыс!

– Ёма-Ёма, ме өд тэкөд вермасьнытө верма на.

– Кыдзи нө тэ мекөд вермасьны кутан – пач чышкан роснад ли мый?

– Пач роскысь вынаджык эм на вермасын-тор.

– Бедь?

– Тэ бедьнад Вөрсаыдкөд вермась. А вот пач йывсьыд мый казытыштін, сійө – бур. Тадзи и вөчам.

– Кыдзи?

– Тэа-меа вай нянь пөжалам. Тэ аслад пачад. Ме аслам. И кодлөн синмаджык лоо няньыс, сійө и вермысь.

– Э-э-э... тадз оз артмы. Колө жюри.

– Жюри колө? Но. Вөрсатө да Васатө и корлам. Тэнад өд найө медбур ёртъяс, колөкө, тэнө и бөръясны... Ставыс, Ёма чой. Пачтө

ломты, няньтö пöжав. Аски аддзысям. Коді вермас, сылөн и Көр.

Вера ставнас зэвтчис тайöс кылöм бöрын. Аски сійö вермас снимайтны и Вöрсаöс, и Васаöс!!! Йес! Татшöм снимокъясыс, дерт нин, некодлөн абуöсь.

Аскинас бабушыс водза-водз чеччис, пöжасис да пöжас тубраснас мöдöдчис вöрö. Вера эз нин вöтчы сы бöрся, тöдiс, мый и гортсянныс сылөн Сонюкыс ставсö снимайтас.

Но ни Вöрсаöс, ни Васаöс Вера эз аддзыв. Фотоаппаратыс тшолкнитiс и кусiс. Вера быдторсö видлiс вöчны, но нинöм эз отсав. Эз аддзыв Вера, кыдзи донъялiсны Ёмалысь да бабушыслысь пöжассö Вöрса да Васа.

А ставыс вöлi тадзи.

Вералөн бабушыс вольсалiс мыр вылö еджыд чышъян да тэчис сы вылö ассьыс пöжассö. Орччөн тэчис пöжассö Ёма. Вöрса первой уськöдчис Ёмалөн пöжас дорас, курччис да пыр и сёлыштiс. А бабушлысь пöжассö сэтшöм азыма кутiс няклявны пиньтöм вомнас, мый Васа кевмыны кутiс, мед и сылы коляс, дзикöдз пö эбöстöмми ва пытшкад няньтöгыд. Ёмалысь пöжассö сійö бабуш пöжас бöрад эз и видлы.

Ёма ставнас чукыртчис-нюкыртчис. Синваыс сöмын оз пет.

— Но мый, Ёма? Коді ыджыдыс танi?

– Коді, коді, – нерис бабушсö Ёма. – Тэ-э-э-э!

– Молодеч! Весиг вензьины эн кут. Тадз-тö тэ регыд зэв прамöй Ёмаөн лоан, – серöктіс бабушыс. – Но вай лэдз Кöрсö.

Ёма скöрысла курччис ассьыс пöжассö да пыр и сьöлыштіс: – Тьпу! – Сэсся бергöдчис ас гөгöрыс да мыйкö öдва кывмөн шуалис.

И со – пуыс кутіс вежöдны, а Кöр матыстчис бабуш дорö, босьтіс небыд вом дорнас бөръя няньсö. Сэсся копыртліс юрсö да и ризöдіс вына кокнас вөр пыдіö.

Бабуш воис гортас да пыригас на кыліс Вералысь шлюпкöмсö.

– Мый нин бара лои, сё зölöта? Ставыс öд бур – Кöртö ми мездім.

– Тэ мездін?

– Кыкөн мездім, тэа-меа...

– Но мед кыкөн... Кöрыс көні?

– Кöрыс? Көнкö помтöм пармаас ризъя-лö...

– Но и бур, – пыр на шлюпкис Вера. – Сöмын коді меныс эскас, мый ме Кöрсö отсалі мездыны? Ме сы мында снимайті – и кос пусö, и Кöр сюрысь гөрд ленточкасö, и Ёматö весиг. А фотоаппаратас ни öти фото абу кольöма.

– Эн бөрд, кага. Тэ öд буртор вöчин. А бурыд йöз паметью и сідз кольö, эскöдöмтöг.

Найдаыдкөд ветлы сійö эрд вылас, көні кос
пуыс сулаліс.

Найда эз тыдав матігөгöрын, да Вера öтнас
и котöртіс. Воис тöдса эрд вылö, а сәні – пуыс
вежсьыс-веж, мичасьыс-мича, сідз и шаракылö
коръяснас. А öти чаллысь Вера аддзис гөрд
ленточкасö. Но эз нин кут снимайтны...

Ышловзис Вера, босьтіс киас ленточкасö
да пуксис пу улö. Регыдөн и Найда воис, водіс
Вера дорö да пуктіс юрсö Вералы пидзöс вы-
лас.

И кытысянькö ылысянь кыліс Көрлөн
гөлös:

– Аттьö-ö-ö, Ве-е-е-р-а-а-а!!!



Литературно-художественное издание
Для детей младшего школьного возраста

ОБРЕЗКОВА НИНА АЛЕКСАНДРОВНА

ВОЛШЕБНЫЙ ПОДАРОК

На коми языке

Художник
Мария Шишкина

Редактор В. И. Трошева
Технический редактор, компьютерная вёрстка – С. И. Оверин
Корректор Г. Г. Оверина

Подписано в печать 11.09.15. Формат 60х84^{1/16}. Бумага офсетная. Печать офсетная
Усл.печ.л. 1,86. Уч.-изд.л. 1,50. Тираж 1160 экз. Заказ № 7458

ООО «Анбур». 167982, г. Сыктывкар, ул. К. Маркса, 229

Отпечатано с готового оригинал-макета в полном соответствии
с качеством предоставленных материалов
в ООО «Коми республиканская типография»
167982, Сыктывкар, ул. В.Савина, 81
Тел. (8212) 28-46-71, 28-46-61, факс 28-46-74

Знак информационной продукции
согласно Федеральному закону
№ 436-ФЗ от 29.12.2010 г.

6+

ISBN 978-5-91669-145-0



9 785916 691450

229, 85



АНБУА

Сыктывкар
2015